



中國邊疆叢書第一輯

祁韻士著

皇朝藩部要略  
(一)

文海出版社印行

皇朝藩部要略

附表四卷

光緒十年冬月  
浙江書局校槧

皇朝藩部要略序

鶴皋大前輩之在翰林也歷年最久當被

命爲蒙古回部諸王公列傳皆內檢黃冊外譯舌人僅能通曉久而後成蓋先生於蒙古回部之事盡勞勩矣  
既進呈爲

欽定蒙古王公列傳編之四庫先生之爲是書也先以年月日編次條其歸附之先後叛服之始終封爵之次第以爲綱領而後分標各藩之事跡而爲之傳名曰藩部要略是傳仿史記而要略仿通鑑也淳父學使視學江左行轅在江陰而兆洛忝主講席因進見叩鶴皋先

生諸書學使因以西陲要略西域釋地見賜而曰藩部  
要略尙未刻也兆洛因請而讀之旣卒業謹拜首稽首  
作而言曰鯁生伏几案終世佔畢矇然不能見五帝三  
王之盛德大業炳耀宇宙其度量所存心志所及不知  
若何其大且遠也乃於此而恍然遇之

皇天眷佑有清懋篤

世德全付以覆燾之下所有疆土無內外弼成大一統  
之規亦惟

列聖追配皇煌帝諦之盛業長駕遠馭用宏茲賁承平  
晏安三百年於今翼子貽孫君臣同慶以享天之福逮

三代以下之極軌夫豈拘學之士井蛙之識所得窺其  
運量哉

太祖高皇帝撫有科爾沁札賚特杜爾伯特郭爾羅斯  
太宗文皇帝綏定柰曼巴林札嚕特喀喇沁土默特敖  
漢四子部落茂明安烏喇特阿嚕科爾沁翁牛特克什  
克騰烏珠穆沁浩齊特蘇尼特阿巴噶鄂爾多斯

世祖章皇帝又納喀爾喀右翼

聖祖仁皇帝又納阿巴哈納爾而內札薩克四十九旗  
備乃平喀爾喀厄魯特土爾扈特西藏和碩特四部  
世宗憲皇帝以西藏編設札薩克

高宗純皇帝平杜爾伯特皆編設佐領編以旗分其於  
諸藩也容之如天地養之如父母照之如日月威之如  
雷霆飢則哺之寒則衣之來則懷之勞則勞之患則拯  
之量材而授任疏之以爵土分之以人民教之以字畜  
申之以制度一民尺土天子無所利焉寸賞斗罰天子  
無有私焉修其教不易其俗齊其政不易其宜曠然更  
始而不驚靡然向風而自化雖背恩悖義如騰機思和  
囉理羅卜藏丹津阿睦爾撒納等叛則討之遁則宥之  
降則舍之甚至噶爾丹之爲患邊圉屢次突犯敗困力  
竭逃無所往猶拳拳賜書招徠開布誠信許以不死蓋

所以求服其心者諄諄無已也

仁皇帝以喀爾喀諸部逼於厄魯特率眾歸附矜其窮  
阨發倉儲以賑其乏賜白金茶布以給其用買牲畜以  
資其生使皆得其所

純皇帝以土爾扈特逼於俄羅斯率眾來歸賜馬牛羊  
二十餘萬屯粟四萬石革裘五六萬領布棉十餘萬帳  
千具至者如歸而費

國帑皆百餘萬

上以此感下以此應服教畏威懷德之恩千萬年曷有  
極哉先生此書於

皇朝數百年以來所以綏養藩服者無不綜具其緣起  
悉載著

列聖恩德之所由隆明威之所以昇恍然造化之亭毒  
皇極之相協如讀蓬皇之書睹鴻蒙開闢之規模焉烏  
可不令承學之士聞所未聞見所未見了然於天人之  
故哉道光十九年冬十月館後學武進李兆洛書於暨  
陽書院之輩學齋

皇朝藩部要略卷之一

前史官壽陽 祁韻士 纂

寶山 毛嶽生 編次

江陰 宋景昌 校寫

平定 張 穆 覆審

內蒙古要略一

蒙古元裔也元之亡其子孫之在漠南北者百餘部率更迭爲盛衰內蒙古皆漠南諸部之近我者科爾沁部六札薩克及札賚特杜爾伯特郭爾羅斯阿魯科爾沁四子部落茂明安烏喇特八部十六旗與阿拉善青海

兩厄魯特其始祖爲元太祖弟哈布圖哈薩爾阿巴噶  
阿巴哈納爾二部四旗其始祖爲元太祖弟布格博勒  
格圖翁牛特部二旗其始祖爲元太祖弟諤楚因其土  
默特右翼一旗及歸化城之間散輔國公皆元太祖十  
六世孫阿爾坦裔其浩齊特蘇尼特烏珠穆沁敖漢奈  
曼鄂爾多斯札嚕特巴林克什克騰喀爾喀十部二十  
二旗與外喀爾喀同祖皆元太祖十五世孫達延車臣  
汗裔也皆姓博爾濟吉特惟喀喇沁及土默特左翼二  
部四旗爲元太祖臣濟拉瑪之裔則姓烏梁罕是爲內  
札薩克四十九旗其察哈爾八旗及歸化城土默特二

旗其初雖亦元裔掌之今皆治以京員與在京之八旗  
蒙古相等不設札薩克初蒙古有強部三曰察哈爾曰  
喀爾喀曰衛拉特後聲轉爲厄魯特明洪熙間科爾沁  
爲厄魯特所破避居嫩江以同族先有阿魯科爾沁乃  
號嫩科爾沁以自別與札賚特杜爾伯特郭爾羅斯皆  
服屬於察哈爾其始得接於我也自

太祖高皇帝癸巳年時葉赫部貝勒布齋與我爲難率  
吟達烏拉輝發錫伯卦爾察珠舍哩訥殷科爾沁凡九  
部合兵三萬分三路來侵先攻札喀城不克退攻赫濟  
格城陳於城外古埒山下

太祖諭諸將曰彼雖眾皆烏合我以逸待勞傷其一二  
台吉眾自潰

命巴圖魯額亦都率百騎挑戰葉赫貝勒布齋科爾沁  
貝勒翁果岱莽古斯明安突而前我軍迎擊大敗之斬  
布齋明安馬蹶裸以遁追至哈達部柴河寨南俘獲甚  
眾明年春科爾沁遣使通好使進駝馬來朝戊申三月  
我師征烏拉部圍宜罕阿林城科爾沁貝勒翁果岱復  
與合兵拒我不敢戰而還

天命二年二月科爾沁貝勒明安來朝先是壬子年明  
安以女歸

太祖其朝也

太祖迎於百里外富爾簡岡明安獻駝十馬牛百

太祖優禮之

賜戶四十甲四十

四年七月下未我兵克明鐵嶺城其夜喀爾喀貝勒齋  
賽札魯特貝勒巴克台吉色本等共引兵萬餘伏稭田  
以伺我大貝勒擊敗之追至遼河大破斬之擒齋賽及  
其二子色特希勒克什克圖與札嚕特部巴克色本兄  
弟科爾沁台吉桑噶爾先是

太祖夜寢夢天鵝白鶴及眾鳥翱翔上下羅之得白鶴

一呼曰得齋賽矣

太祖覺翼曰

告諸貝勒皆曰此吉兆也未幾我大貝勒果獲齋賽既  
班師

諭諸貝勒曰我畜齋賽於此而殄其兵彼所畜人民畜  
產恐爲他部攘而取之不如縱所擒兵五百餘人還其  
國其冬喀爾喀眾貝勒遣使來告合謀并力於明因遣  
使與其部長會盟

五年正月察哈爾林丹汗以書來詞意驕悖

上報書切責之三月己卯釋札嚕特部色本還其國并

賚以裘帶鞍馬色本誓曰若不感恩圖報殃及臣身  
六年三月乙卯克明瀋陽越六日喀爾喀部卓哩克圖  
等二千餘騎乘我兵取遼陽來略瀋陽財粟我駐守兵  
擊之擒三十人斬二十四人縱六人持書歸責其罪八  
月甲申釋齋賽還其國其部人以牲畜一萬來贖又以  
二子一女爲質以質女爲大貝勒代善妃冬十一月喀  
爾喀部台吉古爾布什莽古勒率眾六百戶并驅畜產  
來歸

太祖以女妻古爾布什

賜號青卓呢克圖滿洲蒙古牛錄各一又以族弟濟伯